

摘藻堂四庫全書薈要

史部

欽定四庫全書叢要

史部

通志卷一百二十二



詳校官員外郎

臣楊世綸


欽定四庫全書薈要卷九千三十七

史部

通志卷一百二十二

宋右迪功郎鄭樵漁仲撰

列傳第三十五



魏舒 李熹 劉寔弟智 高光 王渾子濟 王濬 唐

彬 山濤子簡 王戎從弟衍 郭舒 樂廣 鄭袤

子默 李允 盧欽子淳 華表子虞  
默子球 子志 子誌 子虞

子恒

恒弟

石鑒

溫羨

魏舒字陽元任城樊人也少孤為外家甯氏所養甯氏起宅相宅者云當出貴甥外祖母以魏氏甥小而慧意謂應之舒曰當為外氏成此宅相久乃別居身長八尺二寸姿望秀偉飲酒石餘而遲鈍質朴不為鄉親所重從叔父吏部郎衡有名當世亦不之知使守水碓每嘆曰舒堪數百戶長我願畢矣舒亦不以介意不修常人之節不為皎厲之事每欲容才長物終不顯人之短性

好騎射著韋衣入山澤以漁獵為事惟太原王又謂舒  
曰卿終為台輔然今未能令妻子免飢寒吾當助卿營  
之常振其匱乏舒受而不辭舒嘗詣野王主人妻夜產  
俄而聞車馬之聲相問曰男也女也曰男書之十五以  
兵死復問寢者為誰曰魏公舒後十五載詣主人問所  
生兒何在曰因條桑為斧傷而死舒自知當為公矣年  
四十餘郡上計掾察孝廉宗黨以舒無學業勸令不就  
可以為高耳舒曰若試而不中其負在我安可虛竊不

就之高以為己榮乎遂自課百日習一經因而對策升  
第除澠池長遷浚儀令入為尚書郎時欲沙汰郎官非  
其才者罷之舒曰吾即其人也襆被而出同僚素無清  
論者皆有愧色談者稱之累遷後將軍鍾毓長史毓每  
與參佐射舒常為畫籌而已後遇朋人不足以舒滿數  
毓初不知其善射舒容範閑雅發無不中舉坐愕然莫  
有敵者毓嘆而謝曰吾不足以盡卿才有如此射矣豈  
一事哉轉相國參軍封劇陽子府朝碎務未嘗見是非

至於廢興大事衆人莫能斷者舒徐為籌之多出衆議之表文帝深器重之每朝會坐罷目送之曰魏舒堂堂人之領袖也遷宜陽滎陽二郡太守甚有聲稱徵拜散騎常侍出為冀州刺史在州三年以簡惠稱入為侍中武帝以舒清素特賜絹百疋遷尚書以公事當免官詔以贖論舒三娶妻皆亡是歲自表乞假還本郡葬妻詔賜葬地一頃錢五十萬太康初拜右僕射舒與衛瓘山濤張華等以六合混一宜用古典封禪東嶽前後累陳

其事帝譙讓不許以舒為左僕射領吏部舒上言令選六宮聘以玉帛而舊使御府承奉聘宣成嘉禮贄重使輕以為拜三夫人宜使卿九嬪使五官中郎將美人良人使謁者於典制為弘有詔詳之衆議異同遂寢加右光祿大夫儀同三司及山濤薨以舒領司徒有頃即真舒有威重德望祿賜散之九族家無餘財陳留周震累為諸府所辟辟書既下公輒喪亡僉號為殺公掾莫有辟者舒乃命之而竟無患識者以此稱其達命以年老



每稱疾遜位中復暫起署兗州中正尋又稱疾尚書左丞郤詵與舒書曰公久疾小差視事是也唯上所念何意起訖還卧曲身迴法甚失具瞻之望公少立巍巍一旦棄之可不惜哉舒稱疾如初後以災異遜位帝不聽後因正旦朝罷還第表送章綬帝手詔敦勉而舒執意彌固乃詔舒以劇陽子就第位儀同三司祿賜如前几杖不朝賜錢百萬牀帳簟褥自副以舍人四人為劇陽子舍人置官騎十人使光祿勳奉策主者詳案典禮令

皆如舊制於是賜安車駟馬門施行馬舒為事必先行而後言遜位之際莫有知者時論以為晉興以來三公能辭榮善終者未之有也司空衛瓘與舒書曰每與足下共論此事日日未果可謂瞻之在前忽焉在後矣太熙元年薨時年八十二帝甚傷悼賙賻優厚謚曰康子混字延廣清惠有才行為太子舍人年二十七先舒卒朝野咸為舒悲惜舒每哀慟退而嘆曰吾不及莊生遠矣豈以無益自損乎於是終服不復哭詔曰舒惟一子

薄命短折舒告老之年處窮獨之苦每念怛然為之嗟  
悼乃給陽燧四望總牕戶皂輪車牛一乘庶出入觀望  
或足散憂也以庶孫融嗣又早卒從孫晃嗣

李熹字季和上黨銅鞮人也父侁漢大鴻臚熹少有高  
行博學研精與北海管寧以賢良徵不行累辟三府不  
就宣帝復辟熹為太傅屬固辭疾郡縣扶輿上道時熹  
母疾篤乃竊踰泣氏城而徒還遂遭母喪論者嘉其志  
節後為并州別駕時驍騎將軍秦朗過并州州將畢軌

敬焉令乘車至閣熹固諫以為不可軌不得已從之景  
帝輔政命熹為大將軍從事中郎熹到引見謂熹曰昔  
先公辟君而君不應今孤命君而君至何也對曰先公  
以禮見待熹得以禮進退明公以法見繩熹畏法而至  
帝甚重之轉司馬尋拜右長史從討毋丘儉還遷御史  
中丞當官正色不憚彊禦百寮震肅焉薦樂安孫璞亦  
以道德顯時人稱為知人尋遷大司馬以公事免司馬  
仙為寧北將軍鎮鄴以熹為軍司頃之除涼州刺史加

揚威將軍假節領護羌校尉綏御華夷甚有聲績羌虜  
犯塞熹因其隙會不及啟聞輒以便宜出軍深入遂大  
尅獲以功重免譴時人比之漢朝馮甘焉於是請還許  
之居家月餘拜冀州刺史累遷司隸校尉及魏帝告禪  
于晉熹以本官行司徒事副太尉鄭冲奉策泰始初封  
祁侯熹上言故立進令劉友前尚書山濤中山王睦故  
尚書僕射武陟各占官三更稻田請免濤睦等官陟已  
亡請貶諡詔曰友侵刻百姓其考竟以懲邪佞濤等不

貳其過皆勿問熹元志在公當官而行可謂邦之司直  
矣其申敕羣寮各慎所司寬宥之恩不可數遇也熹為  
二代司隸朝野稱之以公事免其年皇太子立以熹為  
太子太傅自魏明帝以後久曠東宮制度廢闕官司不  
具詹事左右率庶子中舍人諸官並未置唯置衛率令  
典兵二傅並攝衆事熹在位累年訓導盡規遷尚書僕  
射拜特進光祿大夫以年老遜位詔熹因光祿之號改  
假金紫置官騎十人賜錢五十萬祿賜班禮一如三司

門施行馬初憇為僕射時涼州虜寇邊憇倡義遣軍討之朝士謂出兵不易虜未足為患竟不從之後虜果大縱逸涼州覆沒朝廷深悔焉以憇清素貧儉賜絹百疋及齊王攸出鎮憇上表諫諍辭甚懇切憇自歷仕雖清非異衆而家無儲糧親舊故人乃至分衣共食未嘗私以王官及卒追贈太保諡曰成子贊嗣少子儉字仲約歷左積弩將軍屯騎校尉儉子弘字世彥少有清節永嘉中歷給事黃門侍郎散騎常侍

劉寔字子真平原高唐人漢濟北惠王壽之後也父廣  
斥丘令寔少貧苦賣牛衣以自給然好學手約繩口誦  
書博通古今清身潔已行無瑕玷郡察孝廉州舉秀才  
皆不行以計吏入洛調為河南尹丞遷尚書郎廷尉正  
後歷吏部郎參文帝相國軍事封循陽子鍾會鄧艾之  
伐蜀也有客問寔曰二將其平蜀乎寔曰破蜀必矣而  
皆不還客問其故笑而不答竟如其言寔之先見皆此  
類也以世多進趣廉遜道廢乃著崇讓論以矯之辭多



不錄泰始初進爵為伯累遷少府咸寧中為太常轉尚書杜預之伐吳也寔以本官行鎮南軍司初寔妻盧氏生子躋而卒華氏將以女妻之寔弟智諫曰華家類貪必破門戶辭之不得竟婚華氏而生子夏寔竟坐夏受賂免官頃之為大司農又以夏罪免寔每還州里鄉人載酒肉以候之寔難逆其意輒共啖之而返其餘或謂寔曰君行高一世而諸子不能遵何不但夕切磋使知過而自改邪寔曰吾之所行是所聞見不相祖習豈復

教誨之所得乎世以寔言為當後起為國子祭酒散騎  
常侍愍懷太子初封廣陵王高選師友以寔為師元康  
初進爵為侯累遷太子太保加侍中特進右光祿大夫  
開府儀同三司領冀州都督九年策拜司空遷太保轉  
太傅太安初寔以老病遜位賜安車駟馬錢百萬以侯  
就第及長沙成都之相攻也寔為軍人所掠潛歸鄉里  
惠帝崩寔赴山陵懷帝即位復授太尉寔自陳年老固  
辭不許左丞劉坦上言以為古之養老以不事為優不

以吏之為重謂宜聽寔所守三年詔寔以候就第位居  
三司之上秩祿準舊賜几杖不朝及宅一區國之大政  
就其諮訪歲餘薨時年九十一諡曰元寔少貧窶杖策  
徒行每所憩止不累主人薪水之事皆自營給及位望  
通顯每崇儉素不尚華麗嘗詣石崇家如廁見有絳紋  
帳裯褥甚麗兩婢持香囊寔便退笑謂崇曰誤入卿內  
崇曰是廁耳寔曰貧士未嘗得此乃更如他廁雖處榮  
寵居無第宅所得俸祿贍卹親故雖禮教陵遲而行已

以正喪妻為廬杖之制終喪不御內輕薄者笑之寔不以介意自少及老篤學不倦雖居職務卷弗離手尤精三傳辨正公羊以為衛輒不應辭以王父命祭仲失為臣之節舉此二端以明臣子之體遂行於世又撰春秋條例二十卷有二子躋夏躋子景雲官至散騎常侍夏以貪污棄放於世寔弟智字子房貞素有兄風少貧窶每負薪自給讀誦不輟竟以儒行稱歷中書黃門吏部郎出為潁川太守平原管輅嘗謂人曰吾與劉潁川兄

弟語使人神思清發昏不假寐自此之外殆白日欲寢  
矣入為秘書監領南陽王師加散騎常侍遷侍中尚書  
太常著喪服釋疑論多所辨明太康末卒諡曰成

高光字宣茂陳留圉城人魏太尉柔之子也光少習家  
業明練刑理初以太子舍人累遷尚書郎出為幽州刺  
史潁川太守是時武帝置黃沙獄以典詔囚以光歷世  
明法用為黃沙御史秩與中丞同遷廷尉元康中拜尚  
書典三公曹時趙王倫篡逆光於其際守道貞全及倫

賜死齊王罔輔政復以光為廷尉遷尚書加奉車都尉  
後從駕討成都王穎有功封延陵縣公邑千八百戶于  
時朝廷咸推光明於用法故頻典理官惠帝為張方所  
逼幸長安朝臣奔散莫有從者光獨侍帝而西遷尚書  
左僕射加散騎常侍光兄誕為上官巳等所用厯徐雍  
二州刺史誕性任放無倫次而決烈過人與光異操常  
謂光小節恒輕侮之光事誕愈謹帝既還洛陽時太弟  
新立重選傳訓以光為少傅加光祿大夫常侍如故及

懷帝即位加光祿大夫金章紫綬與傅祇並見推崇尋  
為尚書令本官如故以疾卒贈司空侍中屬京洛傾覆  
竟未加謚子韜字子遠放佚無檢光為廷尉時韜受貨  
賕有司奏按之而光不知時人雖非光不能防閑其子  
以其用心有素不以為累初光詣長安留臺以韜兼為  
右衛將軍韜與殿省小人交通及光卒仍於喪中往來  
不絕時東海王越輔政不朝覲韜知人心有望密與太  
傅參軍姜頤京兆杜概等謀討越事泄伏誅

王渾字元沖太原晉陽人也父昶魏司空渾沈雅有器量襲父爵京陵侯辟大將軍曹爽掾爽誅隨例免起為懷令參文帝安東軍事累遷散騎黃門侍郎散騎常侍咸熙中為越騎校尉武帝受禪加揚烈將軍遷徐州刺史時年荒歲饑渾開倉賑贍百姓賴之泰始初增封邑千八百戶久之遷東中郎將督淮北諸軍事鎮許昌數陳損益多見納用轉征虜將軍監豫州諸軍事假節領豫州刺史渾與吳接境宣布威信前後降附甚多吳將



薛瑩魯淑衆號十萬淑向弋陽瑩向新息時州兵並放  
休息衆裁一旅浮淮潛濟出其不意瑩等不虞晉師之  
至渾擊破之以功封次子尚為關內侯遷安東將軍都  
督揚州諸軍事鎮壽春吳人大佃皖城圖為邊害渾遣  
揚州刺史應綽督淮南諸軍攻破之並破諸別屯焚其  
積穀百八十餘萬斛稻苗四千餘頃船六百餘艘渾遂  
陳兵東疆視其地形險易歷觀敵城察攻取之勢及大  
舉伐吳渾率師出橫江遣參軍陳慎都尉張喬攻尋陽

瀨鄉又擊吳牙門將孔忠皆破之獲吳將周興等五人

又遣殄吳護軍李純據高望城討吳將俞恭破之多所

斬獲吳厲武將軍陳代平虜將軍朱明懼而來降吳丞

相張悌大將軍孫震等率衆數萬指城陽渾遣司馬孫

疇揚州刺史周浚擊破之臨陣斬二將及首虜七千八

百級吳人大震孫皓司徒何植建威將軍孫晏送印節

詣渾降既而王濬破石頭降孫皓威名益振明日渾始

濟江登建業宮醺酒高會自以先據江上破皓中軍按

甲不進致在王濬之後意甚愧恨有不平之色頻奏濬  
罪狀時人譏之帝下詔曰使持節都督揚州諸軍事安  
東將軍京陵侯王渾督率所統遂逼秣陵令賊孫皓救  
護自衛不得分兵上赴以成西軍之功又摧大敵獲張  
悌使皓塗窮勢盡面縛乞降遂平定秣陵功勲茂著其  
增封八千戶進爵為公封子澄為亭侯弟湛為關內侯  
賜絹八千疋轉征東大將軍復鎮壽陽渾不尚刑名處  
斷明允時吳人新附頗懷畏懼渾撫循羈旅虛懷綏納

座無虛席門不停賓於是江東之士莫不悅附徵拜尚書左僕射加散騎常侍會朝廷立議齊王攸當之藩渾上書言攸至親盛德宜贊朝政今陛下出攸之國假以都督虛號而無典戎幹方之實懼非追述先帝文明太后待攸之宿意也若以攸望重於事宜出者今以汝南王亮代攸亮宣皇帝子文皇帝弟劬駿各處方任有內外之資論以後慮亦不為輕攸今之國適足長異同之論以損仁慈之美耳而令天下窺陛下有不崇親親之

情臣竊為陛下不取也若以妃后外親任以朝政則有  
王氏傾漢之權呂產專朝之禍若以同姓至親則有吳  
楚七國逆亂之殃厯觀古事輕重所在無不為害唯當  
任王道而求忠良耳若以智計猜物雖親見疑至於疏  
遠者庸可保乎愚以為太子太保缺宜留攸居之庶全  
陛下有篤親親之恩使攸蒙仁覆之惠也帝不納太熙  
初遷司徒惠帝即位加侍中又京陵置士官如睢陵比  
及楊駿誅重崇舊臣乃加渾兵渾以司徒文官主吏不

持兵持兵乃吏屬絳衣自以偶因時寵權得持兵非是  
舊典皆令皂服論者美其謙而識體楚王瑋將害汝南  
王亮等也公孫宏說瑋曰昔宣帝廢曹爽引太尉蔣濟  
參乘以增威重大王今舉非常事宜得宿望鎮壓衆心  
司徒王渾宿有威名為三軍所信服可請同乘使物情  
有憑也瑋從之渾辭疾歸第以家兵千餘人閉門距瑋  
瑋不敢逼俄而瑋以矯詔伏誅渾乃率兵赴宮帝嘗訪  
渾元會問郡國計吏方俗之宜渾奏曰陛下欽明聖哲

光于遠近明詔沖虛詢及芻蕘斯乃周文疇咨之求仲  
尼不恥下問也舊三朝元會前計吏詣軒下侍中讀詔  
計吏詭受臣以詔文相承已久無他新聲非陛下留心  
方國之意也可令中書令指宣明詔問方土異同賢才  
秀異風俗好尚農桑本務刑獄得無冤濫守長得無侵  
虐其勤心政化興利除害者授以紙筆盡意陳聞以明  
聖指垂心四遠不復因循常辭且察其答對文義以觀  
計吏人才之實又先帝時正會後東堂見征鎮長史司

馬諸王國卿諸州別駕若不能別見可前詣軒下使侍  
中宣問以審察方國於事為便帝然之又詔渾錄尚書  
事渾所歷之職前後著稱及居台輔聲望日減元康七  
年薨時年七十五諡曰元長子尚早亡次子濟嗣濟字  
武子少有逸才風姿英爽氣蓋一時好弓馬勇力絕人  
善易及莊老文詞俊茂伎藝過人有名當世與姊夫和  
嶠及裴楷齊名尚常山公主年二十起家拜中書郎以  
母憂去官起為驍騎將軍累遷侍中與侍中孔恂王恂



楊濟同列為一時俊彥武帝嘗會公卿藩牧於式乾殿  
顧濟恂而謂諸公曰朕左右可謂恂恂濟濟矣每侍見  
未嘗不咨論人物及萬機得失濟善於清言修飾詞令  
諷議將順朝臣莫能尚焉帝益親貴之仕進雖速論者  
不以主壻之故咸稱才能致之然外雖弘雅而內多忌  
刻好以言傷物儕類以此少之以其父故每排王濬時  
議譏之齊王攸當之藩濟既陳請又累使公主與甄德  
妻長廣公主俱入稽顙泣請帝留攸帝怒謂侍中王戎

曰兄弟至親今出齊王自是朕家事而甄德王濟連遣婦來生哭人以忤旨左遷國子祭酒常侍如故數年入為侍中時渾為僕射主者處事或不當濟性峻厲明法繩之素與從兄佑不平佑黨頗謂濟不能顧其父由是長異同之言出為河南尹未拜坐鞭王官吏免官而王佑始見委任而濟遂被斥外於是乃移第北芒山下性豪侈麗服玉食時洛京地甚貴濟置地為馬埒編錢滿之時人謂為金溝王愷以帝舅奢豪有牛名八百里駉

常瑩其蹄角濟請以錢千萬與牛對射而賭之愷亦自恃其能令濟先射一發破的因據胡牀叱左右速探牛心來須臾而至一割便去和嶠性至儉家有好李帝求之不過數十濟候其上直率少年詣園共啖畢伐樹而去帝嘗幸其宅供饌甚豐悉貯琉璃器中蒸狔甚美帝問其故答曰以人乳蒸之帝色甚不平食未畢而去濟善解馬性嘗乘一馬著連乾鄣泥前有水終不肯渡濟云此必是惜鄣泥使人解去便渡故杜預謂濟有馬癖

帝嘗謂和嶠曰我將罵濟而後官爵之何如嶠曰濟俊  
爽恐不可屈帝因召濟切讓之既而曰知愧不濟答曰  
尺布斗粟之謠常為陛下恥之他人能令親疏臣不能  
使親親以此愧陛下耳帝默然帝嘗與濟碁而孫皓在  
側謂皓曰何以剥人面皮皓曰見無禮於君者則剥之  
濟時伸脚局下而皓譏焉尋使白衣領太僕年四十六  
先渾卒追贈驃騎將軍及其將葬時賢無不畢至孫楚  
雅敬濟而後來哭之甚悲賓客莫不垂涕哭畢向靈牀

曰卿常好我作驢鳴我為卿作之體似聲真賓客皆笑  
楚顧曰諸君不死而令王濟死乎初濟尚公主主兩目  
失明而妬忌尤甚然終無子有庶子二人卓字文宣嗣  
渾爵拜給事中次聿字茂宣襲公主封敏陽侯濟二弟  
澄字道深汶字茂深皆辯惠有才藻並厯清顯

王濬字士治弘農湖人也家世二千石濬博涉墳典美  
姿貌不修名行不為鄉曲所稱晚乃變節疎通亮達恢  
廓有大志嘗起宅開門前路廣數十步人或謂之何太

過濬曰吾欲使容長戟幡旗衆咸笑之濬曰陳勝有言  
燕雀安知鴻鵠之志州郡辟河東從事守令有不廉潔  
者皆望風自引而去刺史燕國徐邈有女才淑擇夫未  
嫁邈乃大會佐吏令女於內觀之女指濬告母邈遂妻  
之後參征南軍事羊祜深知待之祜兄子暨白祜濬為  
人志大奢侈不節不可專任宜有以裁之祜曰濬有大  
才將欲濟其所欲必可用也轉車騎從事中郎識者謂  
祜可謂能舉善焉除巴郡太守郡邊吳境兵士苦役生

男多不養濬乃嚴其科條寬其徭課其產育者皆與休  
復所全活者數千人轉廣漢太守垂惠布政百姓賴之  
濬夜夢懸三刀於卧屋梁上須臾又益一刀濬驚覺意  
甚惡之主簿李毅再拜賀曰三刀為州字又益一者明  
府其臨益州乎及賊張弘殺益州刺史皇甫晏果遷濬  
為益州刺史濬設方畧悉誅弘等以勲封關內侯懷輯  
殊俗待以威信蠻夷徼外多來歸降徵拜右衛將軍除  
大司農車騎將軍羊祜雅知濬有奇畧乃密表留濬於

是重拜益州刺史武帝謀伐吳詔濬修舟艦濬乃作大船連舫方百二十步受二千餘人以木為城起樓櫓開四出門其上皆得馳馬來往又畫鷁首怪獸於船首以懼江神舟楫之盛自古未有濬造船於蜀其木梯蔽江而下吳建平太守吳彥取流梯以呈孫皓曰晉必有攻吳之計宜增建平兵建平不下終不敢渡皓不從尋以謠言拜龍驤將軍監益梁諸軍事語在羊祜傳時朝議咸諫伐吳濬乃上疏曰臣數參訪吳楚同異孫皓荒淫



凶逆荆揚賢愚無不嗟怨且觀時運宜速征伐若今不  
伐天變難預令皓卒死更立賢主文武各得其所則彊  
敵也臣作船七年日有朽敗又臣年已七十死亡無日  
三者一乘則難圖也誠願陛下無失事機帝深納焉賈  
充荀勗陳諫以為不可唯張華固勸又杜預表請帝乃  
發詔分命諸方節度濬於是統兵先在巴郡之所全育  
者皆堪徭役供軍其父母戒之曰王府君生爾爾必勉  
之無愛死也太康元年正月濬發自成都率巴東監軍

廣武將軍唐彬等攻吳丹陽尅之禽其丹陽監盛紀吳人於江險磧要害之處並以鐵鑱橫截之又作鐵錐長丈餘暗置江中以逆巨船先是羊祜獲吳間諜具知情狀濬乃作大筏數十亦方百餘步縛草為人被甲持杖令善水者以筏先行筏遇鐵錐錐輒着筏去又作火炬長十餘丈大數十圍灌以麻油在船前遇鑱然炬燒之須臾融液斷絕於是船無所礙二月庚申尅吳西陵獲其鎮南將軍留憲征南將軍成據宜都太守盧忠壬戌

尅荆門夷道二城獲監軍陸晏乙丑尅樂鄉獲水軍督  
陸景平西將軍施洪等來降乙亥詔進濬為平東將軍  
假節都督益梁諸軍事濬自發蜀兵不血刃攻無堅城  
夏口武昌無復支抗於是順流鼓棹徑造三山皓遣游  
擊將軍張象率舟軍萬人以禦濬象望旗而降皓聞濬  
軍旌旗器甲屬天湍江威勢甚盛莫不破膽用其光祿  
勲薛瑩中書令胡沖計送降文於濬曰吳郡孫皓叩頭  
死罪昔漢室失御九州幅裂先人因時略有江南遂阻

山河與魏乖隔大晉龍興德覆四海閭閻劣偷安未喻天命至於今者猥煩六軍衡蓋路次遠臨江渚舉國震惶假息漏刻敢緣天朝含弘光大謹遣私署太常張夔等奉所佩璽綬委質請命壬寅濬入于石頭皓乃備亡國之禮素車白馬肉袒面縛銜璧牽羊大夫衰服士輿櫬率其僞太子瑾瑾弟魯王虔等二十一人造于壘門濬躬解其縛受璧焚櫬送于京師乃收其圖籍封其府庫軍無私焉帝遣使者犒濬軍初詔書使濬下建平受杜

預節度預至江陵謂諸將帥曰若濬軍得下建平則順  
流長驅威名已著不宜令受制於我若不能克則無緣  
得施節度濬至西陵預與之書曰足下宜摧其西藩便  
當徑取秣陵討累世之逋寇釋吳人於塗炭自江入淮  
逾于泗汴沂河而上振旅還京師亦曠世一事也濬大  
悅表呈預書及濬將至秣陵王渾遣使要令暫過論事  
濬舉帆直指報曰風利不得泊也王渾久破皓中軍斬  
張悌等頓兵未敢進而濬乘勝納降渾恥而且忿乃表

濬違詔不受節度誣罪狀之有司遂按濬檻車徵帝弗  
許下詔讓濬曰伐國事重宜令有一前詔使將軍受安  
東將軍渾節度渾思謀深重案甲以待將軍云何徑前  
不從軍命違制昧利甚失大義將軍功勲簡在朕心當  
率由詔書崇成王法而於事終恃功肆意朕將何以令  
天下濬上書自理曰臣前被庚戌詔書曰軍人乘勝猛  
氣益壯便當順流長驚直造秣陵臣被詔之日即便東  
下又前被詔書云太尉賈充總統諸方自鎮東大將軍

仙及渾濬彬等皆受充節度無令臣別受節度之文臣  
自達巴丘所向風靡知孫皓窮蹙勢無所至十四日至  
牛渚去秣陵二百里宿設部分為攻取節度前至三山  
見渾軍在北岸遣書與臣可暫來過共有所議亦不語  
臣當受節度之意臣水軍風發乘勢造賊城加宿設部  
分行有次第無緣得於長流之中迴船過渾令首尾斷  
絕須臾之間皓遣使歸命臣即報渾書並寫皓牋具以  
示渾使速來當於石頭相待軍以日中至秣陵暮乃被

渾所下當節度之符欲令臣明十六日悉將所領還圍石頭備皓越逸又索蜀兵及鎮南諸軍人名定見臣以爲皓已來首都亭無緣共合空圍又兵人定見不可倉卒皆非當今之急不可承用中詔謂臣忽棄明制專擅自由伏讀嚴詔驚怖悚慄不知軀命當所投厝豈惟老臣獨懷戰灼三軍上下咸盡喪氣臣受國恩任重事大常恐託付不效孤負聖朝故投身死地轉戰萬里被蒙寬恕之恩得從臨履之宜是以憑賴威靈幸而能濟皆



是陛下神策廟算臣承指授效鷹犬之用耳有何勲勞而恃功肆意寧敢昧利而違聖詔臣以十五日至秣陵而詔書以十二日起洛陽其間懸闊不相赴接則臣之罪責宜蒙察恕假令孫皓猶有螳螂舉斧之勢而臣輕軍單入有所虧喪罪之可也臣所統八萬餘人乘勝席卷皓以衆叛親離無復羽翼匹夫獨坐不能庇其妻子雀鼠貪生苟乞一活耳而江北諸軍不知其虛實不早縛取自為小誤臣至便得更見怨恚並云守賊百日而

令他人得之言語噂咻不可聽聞案春秋之義大夫出疆由有專輒臣雖愚惓以為事君之道唯當竭節盡忠奮不顧命量力受任臨事制宜苟利社稷死生以之若其顧護嫌疑以避咎責此是人臣不忠之利實非明主社稷之福也臣不自料忘其鄙劣披布丹心輸寫肝膽欲竭股肱之力加之以忠貞庶必掃除克逆清一宇宙願令聖世與唐虞比隆陛下粗察臣之愚款而識其欲自效之誠是以授臣以方牧之任委臣以征討之事雖

燕王之信樂毅漢祖之任蕭何無以加焉受恩深重死且不報而以頑疎舉措失宜陛下弘恩財加切讓惶怖怔營無地自厝願陛下明臣赤心而已渾又騰周浚書云濬軍得吳寶物濬復表曰被戍戍詔書下安東將軍所上揚州刺史周浚書謂臣諸軍得孫皓寶物又謂牙門將李高放火燒皓偽宮輒公文上尚書具列本末又聞渾案陷上臣臣受性愚忠行事舉動信心而前期於不負神明而已秣陵之事皆如前所表而惡直醜正實

繁有徒欲構南箕成此貝錦公於聖世反白為黑夫佞  
邪害國自古而然故無極破楚宰嚭滅吳及至石顯傾  
亂漢朝皆載在典籍而為世作戒昔樂毅伐齊下城七  
十而卒被讒間脫身出奔樂羊既反謗書滿篋况臣頑  
疎能免讒慝之口然所望全其首領者實賴陛下聖哲  
欽明使浸潤之譖不得行焉然臣孤根獨立朝無黨援  
久棄遐外人道斷絕而結恨彊宗取怨豪族以累卵之  
身處雷霆之衝繭栗之質當豺狼之路其見吞噬豈抗

唇齒夫犯上干主其罪可救乖忤貴臣則禍在不測故  
朱雲折檻嬰逆鱗之怒慶忌救之成帝不問望之周堪  
違忤石顯雖闔朝嗟嘆而死不旋踵此臣之所大怖也  
今渾之支黨姻族外內皆根據盤互並處勢位間遣人  
在洛中專共交構盜言孔甘疑惑觀聽夫曾參之不殺  
人亦以明矣然三人傳之其母投杼今臣之信行未若  
曾參之著而讒構沸騰非徒三夫之對外內扇助為二  
五之應夫猛虎當塗麒麟恐懼況臣脆弱敢不悚慄偽

吳君臣今皆生在便可驗問以明虛實前偽中郎將孔  
攄說去二月武昌失守水軍行至皓案行石頭還左右  
皆跳刀大呼云要當為陛下一死戰決之皓意大喜謂  
必能然便盡出金寶以賜與之小人無狀得便持走皓  
懼乃圖降首降使適去左右劫奪財物略取妻妾放火  
燒宮皓逃身竄首恐不脫死臣至遣參軍主者救斷其  
火耳周浚以十六日前入皓宮臣時遣記室史往視書  
籍浚使收縛若有遺寶則浚前得不應移蹤後人欲求

苟免也臣前在三山得浚書云皓散寶物以賜將士府庫空虛而今復言金銀篋笥動有萬計疑臣軍得之言語反覆無復本末臣復與軍司張牧汝南相馮統等共入觀皓宮乃無席可坐後日又與牧等共視皓舟船渾又先臣一日上其船船上之物皆渾所知見臣之案行皆出其後若有寶貨渾應得之又臣將軍素嚴兵人不  
得妄離部陣間在秣陵諸軍凡二十萬衆臣軍先至為土地之主百姓之心皆歸仰臣臣切勅所領秋毫不犯

諸有市易皆有伍任證佐明從券契有違犯者凡斬十  
三人皆吳人所知也餘軍縱橫詐稱臣軍而臣軍類皆  
蜀人幸以此自別耳豈獨浚之將士皆是夷齊而臣部  
軍悉聚盜跖邪時有八百餘人緣石頭城刼取布帛臣  
牙門將軍馬潛即收得二十餘人並疏其督將姓名移  
以付浚使得自科決而寂無反報疑皆縱遣絕其端緒  
也又聞吳人言前張悌戰時所殺才有二千人而渾浚  
露布言以萬計以吳剛子為主簿而遣剛至洛欲令剛



增斬級之數可具問孫皓及其諸臣則知其定審若信如所聞浚等虛詐尚欺陛下豈惜於臣云臣屯聚蜀人不時送皓欲有反狀又恐動吳人言臣皆當誅殺取其妻子冀其作亂得騁私忿謀反大逆尚以見加其餘謗咥故其宜耳渾案臣瓶罄小器蒙國厚恩頻繁擢叙遂過其任渾此言最信內省慙懼今年平吳誠為大慶於臣之身便受咎累既無孟側策馬之好而令濟濟之朝有讒邪之人虧穆穆之風損皇代之美由臣頑疏使致

於此拜表流汗言不識次濬至京都有司奏濬表既不  
列前後所被七詔月日又赦後違詔不受渾節度大不  
敬付廷尉科罪詔曰濬前受詔徑造秣陵後乃下受渾  
節度詔書稽留所下不至便合與不受詔同責未為經  
通濬不即表上被渾宣詔此可責也濬有征伐之勞不  
足以一眚掩之有司又奏濬赦後燒賊船百三十五艘  
輒勅付廷尉禁推詔曰勿推拜濬輔國大將軍領步兵  
校尉舊校唯五置此營自濬始也有司又奏輔國依比

未為達官不置司馬不給官騎詔依征鎮給五百大車  
增兵五百人為輔國營給親騎百人官騎十人置司馬  
封襄陽縣侯邑萬戶封子彛楊鄉亭侯邑千五百戶賜  
絹萬疋又賜衣一襲錢三十萬及食物濬自以功大而  
為渾父子及豪彊所抑屢為有司所奏每進見陳其攻  
伐之勞及見枉之狀或不勝忿憤逕出不辭帝每容恕  
之益州護軍范通濬之外親也謂濬曰卿功則美矣然  
恨以所居美者未盡善也濬曰何謂也通曰卿旋師之

日角巾私第口不言平吳之事若有問者輒曰聖主之德群帥之力老夫何功之有焉如斯顏老之不伐龔遂之雅對將何以過之藺生所以屈廉頗王渾能無愧乎濬曰吾始懼鄧艾之事畏禍及不得無言末不能遣諸胷中是吾褊也時人咸以濬功重報輕博士秦秀太子洗馬孟康前溫令李密等並表訟濬之屈帝乃遷濬鎮軍大將軍加散騎常侍領後軍將軍王渾詣濬濬嚴設備衛然後見之其相猜防如此濬平吳之後以勲高位

重不復素業自居乃王食錦服縱奢侈以自逸其有辟  
引多是蜀人示不遺故舊也後又轉撫軍大將軍開府  
儀同三司加特進散騎常侍後軍將軍如故太康六年  
卒時年八十諡曰武葬栢谷山大營塋域葬垣周四十  
五里面別開一門松栢茂盛子矩嗣矩弟暢散騎郎暢  
子粹太康十年武帝詔粹尚潁川公主仕至魏郡太守  
濬有二孫過江不見齒錄安西將軍桓溫鎮江陵表言  
之卒不見省

唐彬字儒宗魯國鄒人也父臺太山太守彬有經國大度而不拘行檢少便弓馬好游獵身長八尺走及奔鹿強力兼人晚乃敦悅經史尤明易經隨師受業還家教授恒數百人初為郡門下掾轉主簿刺史王沈集諸參佐盛論距吳之策以問九郡吏彬與譙郡主簿張惲俱陳吳有可兼之勢沈善其對又使彬難言吳未可伐者而辭理皆屈還遷功曹舉孝廉州辟主簿累遷別駕彬忠肅公亮盡規匡救不顯諫以自彰又奉使詣相府計

事于時僚佐皆當世英彥見彬莫不欽悅稱之於文帝  
薦為掾屬帝以問參軍孔顥顥忌其能良久不答陳騫  
在坐斂板而稱曰彬之為人勝騫甚遠帝笑曰但能如  
卿固未易得何論於勝因辟為鎧曹屬帝問曰卿何以  
致辟對曰修業陋巷觀古人之遺跡言滿天下無口過  
行滿天下無怨惡帝顧四坐曰名不虛行他日謂孔顥  
曰近見唐彬卿受蔽賢之責矣初鄧艾之誅也文帝以  
艾久在隴右素得士心一旦夷滅恐邊情騷動使彬密

察之彬還白帝曰鄧艾忌克詭狹矜能負才順從者謂為見事直言者謂為觸迂雖長史司馬參佐牙門答對失指輒見罵辱處身無禮大失人心又好施行事役數勞衆力隴右甚患苦之喜聞其禍不肯為用今諸軍已至足以鎮壓外內願無以為慮俄除尚書水部郎泰始初賜爵關內侯出補鄴令彬導德齊禮朞月化成遷弋陽太守明設禁防百姓安之以母喪去官益州東接吳寇監軍位缺朝議用武陵太守楊宗及彬武帝以問散



騎常侍文立立曰宗彬俱不可失然彬多財慾而宗好酒惟陛下裁之帝曰財慾可足酒者難改遂用彬尋又詔彬監巴東諸軍事加廣武將軍上征吳之策甚合帝意後與王濬共伐吳彬屯據衝要為衆軍前驅每設疑兵應機制勝陷西陵樂鄉多所擒獲自巴陵沔口以東諸賊所聚莫不震懼倒戈肉袒彬知賊寇已殄孫皓將降未至建鄴二百里稱疾遲留以示不競果有先到者爭物後到者爭功于時有識莫不高彬此舉吳平詔以

彬為右將軍都督巴東諸軍事徵拜翊軍校尉改封上庸縣侯食邑六千戶賜絹六千疋朝有疑議每參預焉北虜侵掠北平以彬為使持節監幽州諸軍事領護烏丸校尉右將軍彬既至鎮訓卒利兵廣農重稼震威曜武宣喻國命示以威信於是鮮卑二部大莫虜獍何等並遣侍子入貢兼修學校誨誘無倦仁惠廣被遂開拓舊境却地千里復秦長城塞自溫城洎于碣石縣亘山谷且三千里分軍屯守烽候相望由是邊境安寧無犬

吠之警自漢魏征鎮莫之比焉鮮卑諸種畏懼遂殺大  
莫廐彬欲討之恐列上候報虜必逃散乃發幽冀車牛  
參軍許祇密奏之詔遣御史檻車徵彬付廷尉以事直  
見釋百姓追慕彬功德生為立碑作頌彬初受學於東  
海閭德門徒甚多獨目彬有廊廟才及彬官成而德已  
卒乃為之立碑元康初拜使持節前將軍領西戎校尉  
雍州刺史下教曰此州名都士人林藪處士皇甫申叔  
嚴舒龍姜茂時梁子遠等並志節清茂履行高潔踐境

望風虛心飢渴思加延致待以不臣之典幅巾相見論道而已豈以吏職屈染高規郡國備禮發遣以副於邑之望於是四人皆到彬敬而待之元康四年卒官時年六十謚曰襄賜絹二百疋錢二十萬長子嗣官至廣陵太守少子岐征虜司馬

山濤字巨源河內懷人也父曜宛句令濤早孤居貧少有器量介然不群性好莊老每隱身自晦與嵇康呂安善後遇阮籍便為竹林之交著忘言之契康後坐事臨

刑謂子紹曰巨源在汝不孤矣濤年四十始為郡主簿  
功曹上計掾舉孝廉州辟部河南從事與石鑒共宿濤  
夜起蹴鑒曰今為何等時而眠邪知太傅卧何意鑒曰  
宰相三不朝與尺一令歸第卿何慮也濤曰咄石生無  
事馬蹄間邪投傳而去未二年果有曹爽之事遂隱身  
不交世務與宣穆后有中表親是以見景帝帝曰呂望  
欲仕邪命司隸舉秀才除郎中轉驃騎將軍王昶從事  
中郎久之拜趙國相遷尚書吏部郎文帝與濤書曰足

下在事清朗雅操邁時念多所乏今致錢二十萬穀二百斛魏帝嘗賜景帝春服帝以賜濤又以母老並贈藜杖一枚晚與尚書和逌交又與鍾會裴秀等並申款昵以二人居勢爭權濤平心處中各得其所而俱無恨焉遷大將軍從事中郎鍾會作亂於蜀而文帝將西征時魏氏諸王公並在鄴帝謂濤曰西偏吾自了之後事深以委卿以本官行軍司馬給親兵五百人鎮鄴咸熙初封新沓子轉相國左長史典統別營時帝以濤鄉閭宿

望命太子拜之帝以齊王攸繼景帝後素又重攸嘗問  
裴秀曰大將軍開建未遂吾但承奉後事耳故立攸將  
歸功於兄何如秀以為不可又以問濤濤對曰廢長立  
少違禮不祥國之安危恒必由之太子位於是乃定太  
子親拜謝濤及武帝受禪以濤守大鴻臚護送陳留王  
詣建鄴泰始初加奉車都尉進爵新沓伯及羊祜執政  
時人欲危裴秀濤正色保持之由是失權臣意出為冀  
州刺史加寧遠將軍冀州俗薄無相推轂濤甄拔隱屈

搜訪賢才旌命三十餘人皆顯名當時人懷慕尚風俗  
頗革轉北中郎將督鄴城守事入為侍中遷尚書以母  
老辭職詔曰君雖乃心在於色養然職有上下旦夕不  
廢醫藥且當割情以隆在公濤心求退表疏數十上久  
乃見聽除議郎帝以濤清儉無供養特給日契加賜牀  
帳茵褥禮秩崇重時莫為比後除太常卿以疾不就會  
遭喪歸鄉里濤年逾耳順居喪過禮負土成墳手植松  
栢未幾詔起濤為吏部尚書濤辭以喪病章表懇切會



元皇后崩遂扶輿還洛逼迫詔命自力就職前後選舉周徧內外而並得其才咸寧初轉太子少傅加散騎常侍除尚書僕射加侍中領吏部固辭以老疾上表陳狀章表數十上久不攝職為左丞白袞所奏帝曰濤以病自聞但不聽之耳使濤坐執銓衡則可何必上下邪不得有所問濤不自安上表謝罪詔敦喻之濤不獲已乃起視事濤再起選職十有餘年每一官缺輒啓擬數人詔旨有所向然後顯奏隨帝意所欲為先故帝之所用

或非舉首衆情不察以濤輕重任意或譖之於帝帝手  
詔戒濤曰夫用人惟才不遺疎遠單賤天下便化矣而  
濤行之自若一年之後衆情乃寢濤所奏甄別人物各  
為題目時稱山公啓事濤中立於朝晚值后黨專權不  
欲任楊氏多有諷諫帝雖悟而不能改後以年衰疾篤  
上疏告退免冠徒跣上還印綬詔不許濤苦表請退又  
不許尚書令衛瓘奏濤以微苦久不視職手詔頻煩猶  
未順旨參議以為無專節之尚違在公之義若實沈篤

亦不宜居位可免濤官中詔璿曰濤以德素為朝之望而嘗深退讓至于懇切故比有詔欲必奪其志以匡輔不逮主者既不思明詔旨而反深加詆案虧崇賢之風以重吾不德何以示遠近邪濤不得已又起視事太康初遷右僕射加光祿大夫侍中掌選如故濤以老疾固辭手詔敦譬濤又上表固讓不許吳平之後帝詔天下罷軍役示海內大安州郡悉去兵大郡置武吏百人小郡五十人帝嘗講武於宣武塲濤時有疾詔乘步輦從

因與盧欽論用兵之本以為不宜去州郡武備其論甚精于時咸以濤不學孫吳而闇與之合帝稱之曰天下名言也而不能用及永寧之後屢有變難寇賊熾起郡國皆以無備不能制天下乃至大亂如濤言焉後拜司徒濤復固讓詔不從濤又表乞骸骨詔勅斷章表使者乃卧加章綬濤曰垂沒之人豈可污官府乎輿疾歸家以太康四年薨時年七十九詔賜東園秘器朝服一具衣一襲錢五十萬布百疋以供喪事策贈司徒蜜印紫

綬侍中貂蟬新沓伯璽印青朱綬祭以太牢諡曰康將  
葬賜錢四十萬布百疋左長史范晷等上言濤舊第屋  
十間子孫不相容帝為之立室初濤布衣家貧謂妻韓  
氏曰忍飢寒我後當作三公但不知卿堪為公夫人不  
耳及居榮貴貞慎儉約雖爵同千乘而無嬪媵祿賜俸  
秩散之親故初陳郡袁毅嘗為鬲令貪濁而賂遺公卿  
以求虛譽亦遺濤絲百斤濤不欲異於時受而藏於閣  
上後毅事露檻車送廷尉凡所受賂皆見推檢濤乃取

絲付吏積年塵埃印封如故濤飲酒至八斗方醉帝欲試之乃以酒八斗飲濤而密益其酒濤極本量而止有子五人該淳允謨簡該字伯倫嗣父爵仕至并州刺史太子左率贈長水校尉該子瑋字產祖翊軍校尉次子世回吏部郎散騎常侍淳字子元不仕允字叔真奉車都尉並少疴病形甚短少而聰敏過人武帝聞而欲見之濤不敢辭以問於允允自以疴陋不肯行濤以為勝已乃表曰臣二子疴病宜絕人事不敢受詔謨字季長

明悉有才智官至司空掾簡字季倫性溫雅有父風年二十餘濤不之知簡嘆曰吾年幾三十而不為家公所知後與譙國嵇紹沛郡劉謹弘農楊淮等齊名初為太子舍人累遷太子庶子黃門郎出為青州刺史徵拜侍中頃之轉尚書厯領軍將軍荊州刺史領南蠻校尉不行復拜尚書光熙初轉吏部尚書永嘉初出為雍州刺史鎮西將軍徵為尚書左僕射領吏部簡上疏欲令朝臣各舉所知以廣得才之路朝廷從之永嘉三年出為

征南將軍都督荆湘交廣四州諸軍事假節鎮襄陽于  
時四方寇亂天下分崩王威不振朝野危懼簡優游卒  
歲惟酒是耽諸習氏荆土豪族有佳園池簡每出嬉遊  
多之池上置酒輒醉名之曰高陽池時有童兒歌曰山  
公出何許往至高陽池日夕倒載歸茗芋無所知時時  
能騎馬倒著白接籬舉鞭向葛彊何如并州兒彊家在  
并州簡愛將也尋加都督寧益軍事時劉聰入寇京師  
危逼簡遣督護王萬率師赴難次于涅陽為宛城賊王



如所破遂嬰城自守及洛陽陷沒簡又為賊嚴嶷所逼  
乃遷于夏口招納流亡江漢歸附時華軼以江州作難  
或勸簡討之簡曰與彥夏舊友為之惆悵簡豈利人之  
機以為功伐乎其篤厚如此時樂府伶人避難多奔沔  
漢讌會之日寮佐或勸奏之簡曰社稷傾覆不能匡救  
有晉之罪人也何作樂之有因流涕慷慨坐者感愧焉  
年六十卒追贈征南大將軍儀同三司子遐字彥林為  
餘姚令時江左初基法禁寬弛豪族多挾藏戶口以為

私附遐繩以峻法到縣八旬出口萬餘縣人虞喜以藏戶當棄市遐欲繩喜諸豪彊莫不切齒於遐言於執事以喜有高節不宜屈辱又以遐輒造縣舍遂陷其罪遐與會稽內史何充牋乞留百日窮翦逋逃退而就罪無恨也充申理不能得竟坐免官後為東陽太守為政嚴猛康帝詔曰東陽頃來竟囚每多入重豈郡多罪人將捶楚所求莫能自固邪遐處之自若郡境肅然卒於官王戎字濬冲琅邪臨沂人也祖雄幽州刺史父渾涼州

刺史貞陵亭侯戎幼而穎悟神彩秀徹視日不眩裴楷見而目之曰戎眼爛爛如巖下電年六七歲於宣武場觀戲猛獸在檻中虓吼震地衆皆奔走戎獨立不動神色自若魏明帝於閣上見而奇之又嘗與群兒戲於道側見李樹多實等輩競趨之戎獨不往或問其故戎曰樹在道邊而多子必是苦李取之信然阮籍素與渾為友戎年十五隨渾在郎舍戎少籍二十歲而籍與之交籍每過渾俄頃輒去過視戎良久然後出謂渾曰濬冲

清賞非卿倫也共卿言不如共阿戎談及渾卒於涼州故吏賻贈數百萬戎辭而不受由是顯名為人短小任率不修威儀善發談端賞其要會朝賢嘗上巳禊洛或問王濟曰昨遊有何言談濟曰張華善說史漢裴頠論前言往行衮衮可聽王戎談子房季札之間超然玄著其為識鑒者所賞如此戎嘗與阮籍飲時兗州刺史劉昶字公榮在坐籍以酒少酌不及昶昶無恨色戎異之他日問籍曰彼何如人也答曰勝公榮不可不與飲若

減公榮則不敢不共飲惟公榮可不與飲戎每與籍為  
竹林之遊戎嘗後至籍曰俗物已復來敗人意戎笑曰  
卿輩意亦復易敗耳鍾會伐蜀過與戎別問計將安出  
戎曰道家有言為而不恃非成功難保之難也及會敗  
議者以為知言襲父爵辟相國掾歷吏部黃門郎散騎  
常侍河東太守荊州刺史坐遣吏修園宅應免官詔以  
贖論遷豫州刺史加建威將軍受詔伐吳戎遣參軍羅  
尚劉喬領前鋒進攻武昌吳將楊雍孫述江夏太守劉

朗各率衆詣戎降戎督大軍臨江吳牙門將孟泰以蘄  
春邾二縣降吳平進爵安豐縣侯增邑六千戶賜絹六  
千疋戎渡江綏慰新附宣揚威惠吳光祿勳石偉方直  
不容皓朝稱疾歸家戎嘉其清節表薦之詔拜偉為議  
郎以二千石祿終其身荆土悅服徵為侍中南郡太守  
劉肇賂筒中細布五十端為司隸所糾以知而未納故  
得不坐然議者尤之帝謂朝臣曰戎之為行豈懷私苟  
得正當不欲為異耳帝雖以是言釋之然為清慎者所

鄙由是損名戎在職雖無殊能而庶績修理後遷光祿  
勲吏部尚書以母憂去職性至孝不拘禮制飲酒食肉  
或觀奕碁而容貌毀悴杖然後起裴頠往弔之謂人曰  
若使一慟能傷人濬冲不免滅性之譏也時和嶠亦居  
父喪以禮法自持量米而食哀毀不踰於戎帝謂劉毅  
曰和嶠毀頓過禮使人憂之毅曰嶠雖寢苦食粥乃生  
孝耳至於王戎所謂死孝陛下當先憂之戎先有吐疾  
居喪增甚帝遣醫療之並賜藥物又斷賓客楊駿執政

拜太子太傅駿誅之後東安公繇專斷刑賞威振外內  
戎誠繇曰大事之後宜深遠之繇不從果得罪轉中書  
令加光祿大夫給恩信五十人遷尚書左僕射領吏部  
戎始為甲午制凡選舉皆先治百姓然後授用司隸傳  
咸奏戎曰書稱三載考績三考黜陟幽明今內外群官  
居職未朞而戎奏還既未定其優劣且送故迎新相望  
道路巧詐由生傷農害政戎不仰依堯舜典謨而驅動  
浮華虧敗風俗非徒無益乃有大損宜免戎官以敦風



俗戎與賈郭通親竟得不坐尋轉司徒以王政將圯苟  
媚取容屬愍懷太子之廢竟無一言匡諫裴顧戎之壻  
也顧誅戎坐免官齊王冏起義孫秀錄戎於城內趙王  
倫子欲取戎為軍司博士王繇曰濬冲譎詐多端安肯  
為少年用乃止惠帝反宮以戎為尚書令既而河間王  
顥遣使就說成都王穎將誅齊王冏檄書至冏謂戎曰  
孫秀作逆天子幽逼孤糾合義兵埽除元惡臣子之節  
信著神明二王聽讒造構大難當賴忠謀以和不協卿

其善為我籌之戎曰公首舉義衆匡定大業開闢以來  
未始有也然論功報賞不及有勞朝野失望人懷貳志  
今二王帶甲百萬其鋒不可當若以王就第不失故爵  
委權崇讓此求安之計也問謀臣葛旛怒曰漢魏以來  
王公就第寧有得保妻子乎議者可斬於是百官震悚  
戎偽藥發墮廁得不及禍戎以晉室方亂慕遂伯玉之  
為人與時舒卷無蹇諤之節自經典選未嘗進寒素退  
虛名但與時浮沈戶調門選而已尋拜司徒雖位總鼎

司而委事察察間乘小馬從便門而出游見者不知其  
三公也故吏多至大官道路相遇輒避之性好興利廣  
收八方園田水碓周徧天下積實聚財不知紀極每自  
執牙籌晝夜筭計常若不足而又儉嗇不自奉養天下  
謂之膏肓之疾女適裴顧貸錢數萬久而未還女後歸  
寧戎色不悅女遽還直乃歡從子將婚戎遺其一單衣  
婚訖而更責取家有好李嘗出貨之恐人得種乃鑽其  
核以此獲譏於世其後從帝北伐王師敗績於蕩陰戎

復詣鄴隨帝還洛陽車駕之西遷也戎出奔于邲危難  
之間親執鋒刃談笑自若未嘗有懼容時召親賓歡娛  
永日永興二年薨于邲縣時年七十二諡曰元戎有人  
倫鑒識嘗目山濤如璞玉渾金人皆欽其寶莫知名其  
器王衍神姿高徹如瑤林瓊樹自然是風塵表物謂裴  
頤拙於用長荀勗工於用短陳道寧縷縷如束長竿族  
弟敦有高名戎惡之敦每候戎輒託疾不見敦後果為  
逆亂其鑒賞先見如此嘗經黃公酒壚下過顧謂後車

客曰吾昔與嵇叔夜阮嗣宗酣暢於此竹林之遊亦預其末自嵇阮淪亡吾便為時之所羈縻今日視之雖近邈若山河初孫秀為琅邪郡吏求品於鄉議戎從弟衍將不許戎勸品之及秀得志朝士有宿怨者皆被誅而戎衍獲濟焉子萬有美名少而大肥戎令食糠而肥愈甚年十九卒有庶子興戎所不齒以從弟陽平太守愔子為嗣衍字夷甫神情明秀風姿詳雅總角嘗造山濤濤嗟嘆良久既去目而送之曰何物老嫗生寧馨兒然

誤天下蒼生者未必非此人也父又為平北將軍常有公事使行人列上不時報符年十四在京師造僕射羊祜申陳事狀辭甚清辯祜名德貴重而符幼年無屈下之色衆異之楊駿欲以女妻焉符恥之遂陽狂自免武帝聞其名問戎曰夷甫當世誰為比戎曰未見其比當從古人中求耳泰始八年詔舉奇才可以安邊者符初好論縱橫之術故尚書盧欽舉為遼東太守不就於是口不論世事惟雅詠玄虛而已嘗因宴集為族人所怒

舉標擲其面衍初無言引王導共載而去然心不能平  
在車中攬鏡自照謂導曰爾看吾目光乃在牛背上矣  
父卒於北平送故甚厚為親識之所借貸因以捨之數  
年之間家貲罄盡出就洛城西田園而居焉後為太子  
舍人遷尚書郎出補元城令終日清談而縣務亦理入  
為中庶子黃門侍郎魏正始中何晏王弼等祖述老莊  
立論以為天地萬物皆以無為為本無也者閒物成務  
無往而不存者也陰陽恃以化生萬物恃以成形賢者

恃以為德不肖恃以免身故無之為用無爵而貴矣行  
甚重之唯裴頠以為非著論以譏之而行處之自若行  
既有盛才美貌明悟若神常自比子貢兼聲名籍甚傾  
動當世妙善玄言唯談老莊為事每捉玉柄麈尾與手  
同色義理有所不安隨即改更世號口中雌黃朝野翕  
然謂之一世龍門矣累居顯職後進之士莫不景慕放  
效選舉登朝皆以為稱首矜高浮誕遂成風俗焉行嘗  
喪幼子山簡弔之行悲不自勝簡曰孩抱中物何至於



此衍曰聖人忘情最下不及於情然則情之所鍾正在我輩簡服其言更為之慟衍妻郭氏賈后之親藉中宮之勢剛愎貪戾聚斂無厭好干預人事衍患之而不能禁時有鄉人幽州刺史李陽京師大俠也郭氏素憚之衍謂郭曰非但我言卿不可李陽亦謂不可郭氏為之小損衍疾郭之貪鄙故口未嘗言錢郭欲試之令婢以錢繞牀使不得行衍晨起見錢謂婢曰舉阿堵物却其措意如此後歷北軍中候中領軍尚書令女為愍懷太

子妃太子為賈后所誣衍懼禍自表離婚賈后廢有司  
奏衍曰衍與司徒梁王彤書寫呈皇太子手與妃及衍  
書陳見誣之狀彤等伏讀辭旨懇惻衍備位大臣應以  
義責也太子被誣得罪衍不能守死善道即求離婚得  
太子手書隱蔽不出志在苟免無忠害之操宜加顯責  
以厲臣節可禁錮終身詔從之衍素輕趙王倫之為人  
及倫篡位衍陽狂斫婢以自免及倫誅拜河南尹轉尚  
書又為中書令時齊王冏有匡復之功而專權自恣公

卿皆為之拜行獨長揖焉以病去官成都王穎以行為  
中軍師累遷尚書僕射領吏部後拜尚書令司空司徒  
行雖居宰輔之重不以經國為念而思自全之計說東  
海王越曰中國已亂當賴方伯宜得文武兼資以任之  
乃以弟澄為荊州族弟敦為青州因謂澄敦曰荊州有  
江漢之固青州有負海之險卿二人在外而吾留此足  
以為三窟矣識者鄙之及石勒王彌寇京師以行都督  
征討諸軍事持節假黃鉞以拒之行使前將軍曹武左

衛將軍王景等擊賊退之獲其輜重遷太尉尚書令如故封武陵侯辭封不受時洛陽危逼多欲遷都以避其難而行獨賣車牛以安衆心越之討苟晞也行以太尉為太傅軍事及越薨衆共推行為元帥行以寇賊鋒起辭曰吾少無宦情隨牒推移至於此今日之事安可以非才處之俄而舉軍為石勒所破勒呼王公與之相見問行以晉故行陳禍敗之由云計不在己勒甚悅之與語移日行自說少不豫事欲求自免因勸勒稱尊號

勒怒曰君名蓋四海身居重任少壯登朝至於白首何  
得言不豫世事邪破壞天下正是君罪使左右扶出謂  
其黨孔萇曰吾行天下多矣未嘗見如此人當可活否  
萇曰彼晉之三公必不為我盡力何足貴乎勒曰要不  
可加以鋒刃也使人夜排牆填殺之衍將死顧人言曰  
嗚呼吾曹雖不如古人向若不祖尚浮虛戮力以匡天  
下猶可不至今日時年五十六竹儁秀有令望希心玄  
遠未嘗語利王敦過江嘗稱之曰夷甫處衆中如珠玉

在瓦石間顧愷之作畫贊亦稱衍巖巖清峙壁立千仞  
其為人所尚如此子玄字眉子少慕簡曠亦有俊才與  
衛玠齊名荀藩用為陳留太守屯尉氏玄素名家有豪  
氣荒弊之時人情不附將赴祖逖為盜所害焉澄字平  
子生而警悟雖未能言見人舉動便識其意行妻郭性  
貪鄙欲令婢路上擔糞澄年十四諫郭以為不可郭大  
怒謂澄曰昔夫人臨終以小郎屬新婦不以新婦屬小  
郎因捉其衣裾將杖之澄爭得脫踰窻而走衍有重名

於世時人許以人倫之鑒尤重澄及王敦庾敳嘗為天下人士目曰阿平第一子嵩第二處仲第三澄嘗謂衍曰兄形似道而神峯太雋衍曰誠不如卿落落穆穆然也澄由是顯名有經澄所題目者衍不復有言輒云已經平子矣少歷顯仕累遷成都王穎從事中郎穎嬖豎孟玖譖殺陸機兄弟天下切齒澄發玖私姦勸穎殺玖穎乃誅之士庶莫不稱善及穎敗東海王越請為司空長史以迎大駕勲封南鄉侯遷建威將軍雍州刺史不

之職時王敦謝鯤庾敳阮修皆為衍所親善號為四友而亦與澄狎又有光逸胡毋輔之等亦豫焉酣讌縱誕窮歡極娛惠帝末衍白東海王越以澄為荊州刺史持節都督領南蠻校尉敦為青州衍因問以方畧敦曰當臨事制變不可預論澄辭義鋒出算畧無方一坐嗟服澄將之鎮送者傾朝澄見樹上鵲巢便脫衣上樹探鷺而弄之神氣蕭然傍若無人劉琨謂澄曰卿形雖散朗而內實動俠以此處世難得其死澄默然不答澄既至



鎮日夜縱酒不親庶事雖寇戎急務亦不在懷擢順陽人郭舒於寒悴之中以為別駕委以州府時京師危逼澄率衆軍將赴國難而飄風折其節柱會王如寇襄陽澄前鋒至宜城遣使詣山簡為如黨嚴疑所獲疑偽使人從襄陽來而問之曰襄陽拔未答云昨旦破城已獲山簡乃陰緩澄使令得亡去澄聞襄陽陷以為信然散衆而還既而恥之託糧運不贍委罪長史蔣俊而斬之竟不能進巴蜀流民散在荆湘者與土人忿爭遂殺

縣令屯聚樂鄉澄使成都內史王機討之賊請降澄偽許之既而襲之於寵洲以其妻子為賞沈八千餘人於江中於是益梁流民四五萬家一時俱反推杜弢為主南破零桂東掠武昌敗王機於巴陵澄亦無憂懼之意但與機日夜縱酒投壺博戲數十局俱起殺富人李才取其家資以賜郭舒南平太守應詹驟諫不納於是上下離心內外怨叛澄望實雖損猶傲然自得後出軍擊杜弢次于作塘山簡參軍王冲叛于豫州自稱荊州刺

史澄懼使杜弢守江陵澄遷于孱陵尋奔沓中郭舒諫  
曰使君臨州雖無異政未失衆心今西收華容向義之  
兵足以擒取小虜奈何自棄澄不能從初澄命武陵諸  
郡同討杜弢天門太守扈瓌次于益陽武陵內史武察  
為其郡吏所害瓌以孤軍引還澄怒以杜曾代瓌夷袁  
遂瓌故吏也託為瓌報仇遂舉兵逐曾自稱平晉將軍  
澄使司馬毋丘邈討之為遂所敗會元帝徵澄為軍諮  
祭酒於是赴召時王敦為江州鎮豫章澄過詣敦澄宿

有盛名出於敦右士庶莫不傾慕之兼勇力絕人素為敦所憚澄猶以舊意侮敦敦益忿怒請澄入宿陰欲殺之而澄左右有二十餘人持鐵馬鞭為衛澄手恒捉玉枕以自防故敦未之得發後敦賜澄左右酒皆醉偕玉枕觀之因下牀而謂澄曰何與杜弢通信澄曰事自可驗敦欲入內澄手引敦衣至于絕帶乃登于梁因罵敦曰行事如此殃將及焉敦令力士路戎搃殺之時年四十四載尸還其家劉琨聞澄之死歎曰澄自取之及敦

平澄故吏佐著作郎桓稚上表理澄請加贈諡詔復澄  
本官諡曰憲長子詹早卒次子徽右軍司馬郭舒字稚  
行幼請其母從師歲餘便歸粗識大義鄉人少府范晔  
宗人武陵太守郭景咸稱舒當為後來之秀終成國器  
始為領軍校尉坐擅放司馬彪繫廷尉世多義之刺史  
夏侯含辟為西曹轉主簿含坐事舒自繫理含事得釋  
刺史宗岱命為治中喪母去職劉弘牧荊州引為治中  
弘卒舒率將士推弘子璠為主討逆賊郭勦滅之保全

一州王澄聞其名引為別駕澄終日酣飲不以衆務在意舒常切諫之及天下大亂又勸澄修德養威保完州境澄以亂自京都起非復一州所能匡禦雖不能從然重其忠亮荆土士人宗獻嘗因酒忤澄澄怒叱左右棒獻舒厲色謂左右曰使君過醉汝輩何敢妄動澄恚曰別駕狂邪誑言我醉因遣搯其鼻炙其眉頭舒跪而受之澄意少釋而獻遂得免澄之奔敗也以舒領南郡澄又欲將舒東下舒曰舒為萬里紀綱不能匡正令使君

奔亡不忍渡江乃留屯沌口采稻湖澤以自給鄉人盜食舒牛事覺來謝舒曰卿飢所以食牛耳餘肉可共啖之世以此服其弘量舒少與杜曾厚曾嘗召之不往曾銜之至是澄又轉舒為順陽太守曾密遣兵襲舒遁逃得免王敦召為參軍轉從事中郎襄陽都督周訪卒敦遣舒監襄陽軍甘卓至乃還朝廷徵舒為右丞敦留不遣敦謀為逆舒諫不從使守武昌荊州別駕宗澹忌舒才能數譖之於王廙廙疑與甘卓同密以白敦敦不受

高官督護繆坦嘗請武昌城西地為營太守樂凱言於  
敦曰百姓久買此地種菜自贍不宜奪之敦大怒曰王  
處仲不來江湖當有武昌地而不人云是我地邪凱懼  
不敢言舒曰公聽舒一言敦曰平子以卿病狂故指鼻  
灸眉頭舊疾復發邪舒曰古之狂也直周昌汲黯朱雲  
不狂也昔堯立誹謗之木舜置敢諫之鼓然後事無枉  
縱公為勝堯舜邪乃逆折舒使不得言何與古人相遠  
郭曰卿欲何言舒曰繆坦可謂小人疑誤視聽奪人私



地以彊凌弱晏子稱君曰其可臣獻其否以成其可是  
以舒等不敢不言敦即使還地衆咸壯之敦重舒公亮  
給賜轉豐數詣其家表為涼州刺史病卒

樂廣字彥輔南陽滎陽人也父方參魏征西將軍夏侯  
玄軍事廣時年八歲玄嘗見廣在路因呼與語還謂方  
曰向見廣神姿朗徹當為名士卿家雖貧可令專學必  
能興卿門戶也方早卒廣孤貧僑居山陽寒素為業人  
無知者性沖約有遠識寡嗜欲與物無競尤善談論每

以約言析理以厭人之心其所不知默如也裴楷嘗引  
廣共談自夕申旦雅相欽挹嘆曰我所不如也王戎為  
荊州刺史聞廣為夏侯玄所賞乃舉秀才楷又薦廣於  
賈充遂辟太尉掾轉太子舍人尚書令衛瓘朝之耆舊  
逮與魏正始中諸名士談論見廣而奇之曰自昔諸賢  
既沒嘗恐微言將絕而今乃復聞斯言於君矣命諸子  
造焉曰此人之水鏡見之瑩然若披雲霧而覩青天也  
王衍自言與人語甚簡至及見廣便覺已之煩其為識

者所嘆美如此出補元城令遷中書侍郎轉太子中庶  
子累遷侍中河南尹廣善清言而不長於筆將讓尹請  
潘岳為表岳曰當得君意廣乃作二百句語述已之志  
岳因取次比便成名筆時人咸云若廣不假岳之筆岳  
不取廣之旨無以成斯美也嘗有親客久闊不復來廣  
問其故答曰前在坐蒙賜酒方欲飲見盃中有蛇意甚  
惡之既飲而疾于時河南聽事壁上有角漆畫作蛇廣  
意盃中蛇即角影也復置酒問客曰酒中復有所見不

答曰所見如初廣乃告其所以客豁然意解沈痾頓愈  
衛玠總角時嘗問廣夢廣云是想玠曰神形所不接而  
夢豈是想耶廣曰因也玠思之經月不得遂以成疾廣  
聞故命駕為剖析之玠病即愈廣嘆曰此賢胷中必無  
膏肓之疾廣所在為政無當時功譽然每去職遺愛為  
人所思凡所論人必先稱其所長則所短不言而自見  
矣人有過先盡弘恕然後善惡自彰矣廣與王衍俱宅  
心事外名重於時故天下言風流者謂王樂為稱首焉

少與弘農楊準相善準之二子曰喬曰髦皆知名於世  
準使先詣裴顧顧性弘方愛喬有高韻謂準曰喬當及  
卿髦少減也又使詣廣廣性清純愛髦有神檢謂準曰  
喬自及卿然髦亦清出準笑曰我二兒之優劣乃裴樂  
之優劣也論者以為喬雖有高韻而神檢不足樂為得  
之矣是時王澄胡毋輔之等皆亦任放為達或至裸體  
者廣聞而笑曰名教內自有樂地何必乃爾其居才愛  
物動有理中皆此類也值世道多虞朝章紊亂清已中

正任誠保素而已時人莫有見其際焉先是河南官舍多妖怪前尹皆不敢處正寢廣居之不疑嘗外戶自閉左右皆驚廣獨自若顧見牆有孔使人掘牆得狸而殺之其怪亦絕愍懷太子之廢也詔故臣不得辭送衆官不勝憤嘆皆冒禁拜辭司隸校尉滿奮勅河南中部收縛拜者送獄廣即便解遣衆人代廣危懼孫琰說賈謐曰前以太子罪惡有斯廢黜其臣不懼嚴詔冒罪而送今若係之是彰太子之善不如釋去謐然其言廣故得

不坐遷吏部尚書左僕射後東安王繇當為僕射轉廣  
為右僕射領吏部代王戎為尚書始戎薦廣而終踐其  
位時人美之成都王穎廣之壻也及與長沙王又遇難  
而廣既處朝望羣小讒謗之又以問廣廣神色不變徐  
答曰廣豈以五男易一女又猶以為疑廣竟以憂疾卒  
荀藩聞廣之不免也為之流涕三子凱肇謨凱字弘緒  
大司馬齊王掾參驃騎軍事肇字弘茂太傅東海王掾  
洛陽陷兄弟相攜南渡江謨字弘範征虜將軍吳郡內

史

鄭袤字林叔滎陽開封人也高祖衆漢大司農父泰揚  
州刺史有高名袤少孤早有識鑒荀攸見之曰鄭公業  
為不亡矣隨叔父渾避難江東時華歆為豫章太守渾  
往依之歆素與泰善撫養袤如己子年十七乃還鄉里  
性清正時濟陰魏諷為相國掾名重當世袤同郡任覽  
與結交袤以諷奸雄終必為禍勸覽遠之及諷敗論者  
稱焉魏武帝初封諸子為侯精選賓友袤與徐幹俱為



臨淄侯文學轉司隸功曹從事司空王朗辟為掾袁舉  
高陽許允扶風魯芝東萊王基朗皆命之後咸至大位  
有重名袁遷尚書郎出為黎陽令吏民悅服太守班下  
屬城特見甄異為諸縣之最遷尚書右丞轉濟陰太守  
下車旌表孝悌敬禮賢能興立庠序開誘後進調補大  
將軍從事中郎拜散騎常侍會廣平太守缺宣帝謂袁  
曰賢叔大匠垂稱於陽平魏郡百姓蒙惠化且盧子家  
王子雍繼踵此郡世不乏賢故復相屈袁在廣平以德

化為先善作條教郡中愛之徵拜侍中百姓戀慕涕泣  
路隅遷少府高貴鄉公即位袁與河南王肅備法駕奉  
迎於元城封廣昌亭侯徙光祿勳領宗正母丘儉作亂  
景帝自出征之百官祖送於城東袁疾病不任會帝謂  
中領軍王肅曰唯不見鄭光祿為恨肅以語袁袁自輿  
追帝及於近道帝笑曰故知侯生必來也遂與袁共載  
曰計將何先袁曰昔與儉俱為臺郎特所知悉其人好  
謀而不達事情自昔建勲幽州志望無限文欽勇而無

算今大軍出其不意江淮之卒銳而不能固深溝高壘以挫其氣此亞夫之長也帝稱善轉太常高貴鄉公議立明堂辟雍精選博士袁舉劉毅劉寔程咸庾峻後並至公輔大位及常道鄉公立與議定策進封安成鄉侯邑千戶景元初疾病失明屢乞骸骨不許拜光祿大夫五等初建封密陵伯武帝踐祚進爵為侯雖寢疾十餘年而時賢並相推薦泰始中詔以袁為司空天子臨軒遣五官中郎將國坦就第拜授袁前後辭讓遣息稱上

送印綬至于十數謂坦曰魏以徐景山為司空吾時為侍中受詔譬旨徐公語吾曰三公當上應天心苟非其人實傷和氣不敢以垂死之年累辱朝廷也終於不就遵大雅君子之迹可不務乎固辭久之見許以侯就第拜儀同三司置舍人官騎賜牀帳簟褥錢五十萬九年薨時年八十五帝於東堂發哀賜秘器朝服一具衣一襲錢三萬絹布各百疋以供喪事諡曰元有子六人長子默嗣次質舒詡稱予位並列卿默字思元起家秘書

郎考覈舊文刪省浮穢中書令虞松謂曰而今而後朱  
紫別矣轉尚書考功郎專典伐蜀事封關內侯遷司徒  
左長史武帝受禪與太原郭奕俱為中庶子朝廷以太  
子官屬宜稱陪臣默上言皇太子體皇極之尊無私於  
天下宮臣皆受命天朝不得同之藩國事遂施行出為  
東郡太守值歲荒人飢默輒開倉賑給乃舍都亭自表  
待罪朝廷嘉默憂國詔書褒嘆比之汲黯班告天下若  
郡縣有此比者皆聽出給入為散騎常侍初帝以貴公

子當品鄉黨莫敢與為輩求之州內於是十二郡中正  
僉共舉默文帝與袁書曰小兒得廁賢子之流愧有竊  
賢之累及武帝出祠南郊使默驂乘因謂默曰卿知何以  
得驂乘乎昔州里舉卿相輩常愧有累清談遂問政事  
對曰勸穡務農為國之基選人得才濟世之道居官久  
職政事之宜明慎黜陟勸戒之由崇尚儒素化導之本  
如此而已矣帝善之後以父喪去官尋起為廷尉是時  
禹令袁毅坐交通貨賂大興刑獄在朝多見引逮唯默

兄弟以潔慎不染其流遷太常時僕射山濤欲舉一親  
親為博士謂默曰卿似尹翁歸令吾不敢復言默為人  
敦重柔而能整皆此類也及齊王攸當之國下禮官議  
崇錫典制博士祭酒曹志等並立異議默容過其事免  
官尋拜大鴻臚遭母喪舊制既葬還職默自陳懇至久  
而見許遂改法定令聽大臣終喪自默始也服闋為大  
司農轉光祿勳太康元年卒時年六十八諡曰成尚書  
令衛瓘奏默才行名望宜居論道五升九卿位未稱德

宜贈三司而后父楊駿先欲以女妻默子豫默曰吾每  
讀雋不疑傳常想其為人畏遠權貴奕世所守遂辭之  
駿深為恨至此駿議不同遂不施行默寬沖博愛謙虛  
溫謹不有才地矜物事上以禮遇下以和雖僮豎廝養  
不加聲色而猶有嫌怨故士君子以為居世之難子球  
字子瑜少辟宰府入侍二宮成都王為大將軍起義討  
趙王倫球自頓丘太守為右長史以功封平壽公累遷  
侍中尚書散騎常侍中護軍尚書右僕射領吏部永嘉



二年卒追贈金紫光祿大夫諡曰元球弟豫永嘉末為尚書

李允字宣伯遼東襄平人也祖敏漢河南太守去官還鄉里遼東太守公孫度欲彊用之敏乘輕舟浮滄海莫知所終允父信追求積年浮海出塞無所見欲行喪制服則疑父尚存情若居喪而不聘娶後有鄰居故人與其父同年者亡因喪制服燕國徐邈與之同州里以不孝莫大於無後勸使娶妻既生允遂絕房室常如居喪

禮不堪其憂數年而卒允既幼而孤母又改行有識之  
後降食哀戚亦以喪禮自居又以祖不知存亡設木主  
以事之由是以孝聞容貌質素頽然若不足者而智度  
沈邃言必有則初仕郡上計掾州辟部從事治中舉孝  
廉參鎮北軍事遷樂平侯相政尚清簡入為尚書郎遷  
中護軍司馬吏部郎銓綜廉平賜爵關中侯出補安豐  
太守文帝引為大將軍從事中郎遷御史中丞恭恪直  
繩百官憚之伐蜀之役為西中郎將督關中諸軍事後

為河南尹封廣陵伯泰始初拜尚書進爵為侯允奏以  
為古者三公坐而論道內參六官之事外與六卿之教  
或處三槐兼聽獄訟稽疑之典謀及卿士陛下聖德欽  
明垂心萬機猥發明詔儀刑古式雖唐堯疇諮周文翼  
翼無以加也自今以往國有大政可親延羣公詢納讜  
言其軍國所疑延詣省中使侍中尚書諮論所宜若有  
疾疢不任覲會臨時遣侍臣訊訪詔從之遷吏部尚書  
僕射尋轉太子少傅詔以允忠允高亮有匪躬之節使

領司隸校尉允屢自表讓忝傳儲官不宜兼監司之官  
武帝以二職並須忠賢故每不許咸寧初皇太子出居  
東宮帝以司隸事任峻重而少傅有旦夕輔導之務允  
素羸不宜久勞之轉拜侍中加特進俄遷尚書令侍中  
特進加故允雖歷職內外而家至貧儉兒病無以市藥  
帝聞之賜錢十萬其後帝以司徒舊丞相之職詔以允  
為司徒在位五年簡亮持重稱為任職以吳會初平大  
臣多有勲勞宜有登進乃上疏遜位帝不聽遣侍中宣

旨優詔敦喻絕其章表允不得已起視事太康三年薨  
詔遣御史持節監喪致祠諡曰成皇太子命舍人王贊  
誄之文義甚美帝後思允清節詔曰故司徒李允太常  
彭灌並履忠清儉身歿家無餘積賜允家錢二百萬穀  
千斛灌家半之三子固真長修固字萬基散騎郎先允  
卒固子志嗣爵志字彥道歷位散騎侍郎建威將軍陽  
平太守真長位至太僕卿修黃門侍郎太弟中庶子  
盧欽字子若范陽涿人也祖植漢侍中父毓魏司空世

以儒業顯欽清澹有遠識篤志經史舉孝廉不行魏大將軍曹爽辟為掾爽弟嘗有所屬請欽白爽子弟不宜干犯法度爽深納之而罰其弟除尚書郎爽誅免官後為侍御史襲父爵大利亭侯累遷琅邪太守宣帝為太傅辟從事中郎出為陽平太守遷淮北都督伏波將軍甚有稱績徵拜散騎常侍大司農遷吏部尚書進封大梁侯武帝受禪以為都督沔北諸軍事平南將軍假節追鋒軺卧車各一乘第二駙馬二乘騎具刀器御府人

馬鎧等及錢三十萬欽在鎮寬猛得中疆場無虞入為  
尚書僕射加侍中奉車都尉領吏部以清貧特賜絹百  
匹欽舉必以才稱為廉平咸寧四年卒詔贈衛將軍開  
府儀同三司賜秘器朝服一具衣一襲布五十匹錢三  
十萬諡曰元又以欽忠清高潔不營產業身歿之後家  
無所庇特賜錢五十萬為立第舍復下詔曰故司空王  
基衛將軍盧欽典領軍將軍楊囂並素清貧身歿之後  
居無私積頃者飢饉聞其家大匱其各賜穀三百斛欽

歷宰州郡不尚功名唯以平理為務祿俸散之親故不營貨產動循禮典妻亡制廬杖終喪居外所著詩賦論難數十篇名曰小道子浮嗣浮字子雲起家太子舍人病疽截手遂廢然朝廷器重之以為國子博士祭酒秘書監皆不就欽弟琨字子笏衛尉卿琨子志字子道初辟公府掾尚書郎出為鄴令成都王穎之鎮鄴也愛其才量委以心膂遂為謀主齊王冏起義遣使告穎穎召志計事志曰趙王無道肆行篡逆四海人神莫不憤怒



今殿下總率三軍應期電發子來之衆不召自至埽夷  
凶逆必有征無戰然兵事至重聖人所慎宜旌賢任才  
以收時望穎深然之改選上佐高辟掾屬以志為諮議  
參軍仍補左長史專掌文翰穎前鋒都督趙驤為倫所  
敗士衆震駭議者多欲還保朝歌志曰今我軍失利敵  
新得勝必有輕易陵轢之情若頓兵不進三軍畏衄懼  
不可用且戰何能無勝負宜更選精兵星行倍道出賊  
不意此用兵之奇也穎從之及倫敗志勸穎曰齊王衆

號百萬與張泓等相持不能決大王逕得濟河此之大  
勲莫之與比而齊王今當共大王共輔朝政志聞兩雄  
不俱處功名不共立今宜因太妃微疾求還定省推崇  
齊王徐結四海之心此計之上也穎納之遂以母疾還  
藩委重於罔由是穎獲四海之譽天下歸心朝廷封志  
為武彊侯加散騎常侍及河間王顥納李含之說欲內  
除二王樹穎儲副遣報穎穎將應之志正諫不從及罔  
滅穎遙執朝權遂懷觖望之心以長沙王乂在內不得

恣其所欲密欲去又時荊州有張昌之亂穎表求親征  
朝廷許之會昌等平乃迴兵以討又志諫曰公前有復  
皇祚之大勲及事平歸功於齊辭九錫之賞不當朝政  
之權振陽翟飢民葬黃橋白骨皆盛德之事四海之人  
莫不荷賴矣逆寇縱肆猾擾荆楚今公掃清群難南上  
以寧振旅而旋頓軍關外文服入朝此霸王者之事也  
穎不納及父死穎表志為中書監留鄴參署相府事乘  
輿敗於蕩陰穎遣志督兵迎帝及王浚攻鄴志勸穎奉

天子還洛陽時甲士尚萬五千人志夜部分至曉衆皆成列而程太妃戀鄴不欲去穎未能決俄而衆潰唯志與子謐兄子絀殿中虎賁千人而已志復勸穎早發時有道士姓黃號曰聖人太妃信之及使呼入道士求兩杯酒飲訖拋杯而去於是志計始決而人馬復散志於營陳間尋索得數乘鹿車司馬督韓元收集黃門得百餘人志入帝問志曰何故散敗至此志曰賊去鄴尚八十里而人士一朝駭散太弟今欲奉陛下還洛陽帝曰

甚佳於是御犢車便發屯騎校尉郝昌先領兵八千守洛陽帝召之至汲郡而昌至兵杖甚盛志喜於復振啓天子宜下赦書與百姓同其休慶既達洛陽志啓以滿奮為司隸校尉奔散者多還百官粗備帝悅賜志絹二百疋綿百斤衣一襲鶴翎袍一領初河間王顥聞王浚起兵遣右將軍張方救鄴方聞成都軍敗頓兵洛陽不敢進縱兵虜掠密謀遷都長安將焚宗廟宮室以絕人心志說方曰昔董卓無道焚燒洛陽怨毒之聲百年猶

存何為襲之乃止方遂逼天子幸其壘帝垂泣就輿唯  
志侍側曰陛下今日之事當一從右將軍臣驚怯無所  
云補唯知盡微誠不離左右而已停方壘三日便西志  
復從至長安穎被黜志亦免官及東海王越奉迎大駕  
顥啓帝復穎還鄴以志為魏郡太守加左將軍隨穎北  
鎮行達洛陽而平昌公模遣前鋒督護馮嵩距穎還  
長安未至而聞顥斬張方求和於越穎住華陰志進長  
安詣闕陳謝即還就穎於武關復為劉陶所驅迴詣河

北及穎薨官屬奔散唯志親自殯送時人嘉之越命志  
為軍諮祭酒遷衛尉永嘉末轉尚書洛陽歿志將妻子  
北投并州刺史劉琨至陽邑為劉粲所虜與次子謚詵  
等俱遇害於平陽長子諶字子諒清敏有理思好老莊  
善屬文選尚武帝女滎陽公主拜駙馬都尉未成禮而  
公主卒後州舉秀才辟太尉掾洛陽沒隨志北依劉琨  
與志俱為劉粲所虜粲據晉陽留諶為參軍琨收散卒  
引猗盧騎還攻粲粲敗走諶得赴琨先父母兄弟在平

陽者悉為劉聰所害琨為司空以諶為主簿轉從事中郎琨妻即諶之從母既加親愛又重其才地建興末隨琨投段匹磾匹磾自領幽州取諶為別駕匹磾既害琨尋亦敗喪時南路阻絕段末波在遼西諶往投之元帝之初末波通使於江左諶因其使抗表理琨文旨甚切於是即加弔祭累徵諶為散騎中書侍郎而為末波所留遂不得南渡末波死弟遼代立諶流離世故且二十載石虎攻破遼西復為虎所得以為中書侍郎國子祭



酒侍中中書監屬冉閔誅滅石氏謚隨閔軍於襄國遇害時年六十七是歲永和六年也謚名家子早有聲譽才高行潔為一時所推值中原喪亂與清河崔悅潁川荀綽河東裴憲北地傅暢並淪陷非所雖俱顯於石氏恒以為辱謚每謂諸子曰吾身沒之後但稱晉司空從事中郎爾撰祭法注莊子及文集皆行於世悅字道儒魏司空林曾孫劉琨妻之姪也與謚俱為琨司空從事中郎後為末波佐史沒石氏亦居大官其綽憲暢並別

有傳

華表字偉容平原高唐人也父歆清德高行為魏太尉  
表年二十拜散騎黃門郎累遷侍中正元初石苞來朝  
盛稱高貴鄉公以為魏武更生時聞者流汗沾背表懼  
禍作頻稱疾歸下舍故免於大難後遷尚書五等建封  
觀陽伯坐供給喪事不整免泰始中拜太子少傅轉光  
祿勳遷太常卿數歲以老病乞骸骨詔曰表清貞履素  
有老成之美久幹王事靜恭匪懈而以疾固辭章表懇

至令聽如所上以為大中大夫賜錢二十萬牀帳褥席  
祿賜與鄉同門施行馬表以苦節垂名司徒李允司隸  
王宏等並嘆美表清澹退靜以不可得貴賤而親疎也  
咸寧元年八月卒時年七十二諡曰康詔賜朝服有六  
子廙岑嶠鑒澹簡廙字長駿弘敏有才藝妻父盧毓典  
選難舉親姻故廙年三十五不得調晚為中書通事郎  
泰始初遷冗從僕射少為武帝所禮歷黃門侍郎散騎  
常侍前軍將軍侍中南中郎將都督河北諸軍事父疾

篤輒還仍遭喪舊例葬訖復任廩固辭迂旨初表有賜客在鬲使廩因縣令袁毅錄名三客各代以奴及毅以貨賕致罪獄辭迷謬不復顯以奴代客直言送三奴與廩而毅亦盧氏壻也又中書監荀勗先為中子求廩女廩不許為恨因密啓帝以袁毅貨賕者多不可盡罪宜責最所親者一人因指廩當之又緣廩有違迂之咎遂於喪服中免廩官削爵土大鴻臚何遵奏廩免為庶人不應襲封請以表世孫混嗣表有司奏曰廩所坐除名

削爵一時之制廩為世子著在名簿不聽襲嗣此為刑  
罰再加諸侯犯法八議平處者褒功重爵也嫡統非犯  
終身棄罪廢之為重依律應聽襲封詔曰諸侯薨子踰  
年即位此古制也應即位而廢之爵命皆去矣何為罪  
罰再加且吾之責廩以肅貪穢本不論常法也諸賢不  
能將明此意乃更詭易禮律不顧憲度君命廢之而羣  
下復之此為上下正相反也於是有司奏免議者官詔  
皆以贖論混以世孫當受封逃避斷髮陽狂病瘖不能

語故得不拜世咸稱之虞棲遲家巷垂十載教誨子孫  
講誦經典集經書要事名曰善文行於世與陳總共造  
睹蘭於宅側帝嘗出視之問其故左右以實對帝心憐  
之帝後又登陵雲臺望見虞首宿園阡陌甚整依然感  
舊太康初大赦乃得襲封久之拜城門校尉遷左衛將  
軍數年以為中書監惠帝即位加侍中光祿大夫尚書  
令進爵為公應楊駿召不時還有司奏免官尋遷太子  
少傅加散騎常侍動遵禮典得傳導之儀後年衰病篤

詔遣太醫療病進位光祿大夫開府儀同三司時河南  
尹韓壽因託賈后求以女配虞孫陶虞距而不許后深  
以為恨故遂不登台司年七十五卒諡曰元三子混蒼  
恒混字敬倫嗣父爵清貞簡正位侍中尚書卒官子陶  
嗣補鞏令沒於石勒蒼字敬叔為河南尹與荀藩荀組  
俱避賊至臨潁父子並遇害恒字敬則博學以清素為  
稱尚武帝女滎陽長公主拜駙馬都尉元康初東宮建  
恒以選為太子賓客賜爵關內侯食邑百戶辟司徒王

渾倉曹掾屬除散騎侍郎遷散騎常侍北軍中候俄拜  
領軍加散騎常侍愍帝即位以恒為尚書進爵苑陵縣  
公頃之劉聰逼長安詔出恒為鎮軍將軍領潁川太守  
以為外援恒與合義軍得二千人未及西赴而關中陷  
歿時羣賊方盛所在州郡相繼奔敗恒亦欲棄郡東渡  
而從兄軼為元帝所誅以此為疑先書與驃騎將軍王  
導導言於帝帝曰兄弟罪不相及况羣從乎即召恒補  
光祿勳恒到未及拜更以為衛將軍加散騎常侍本州



大中正尋拜太常議立郊祀尚書刁協國子祭酒杜彞  
議須還洛乃修郊祀恒議漢獻帝居許即便郊柴宜於  
此修立司徒荀組驃騎將軍王導同恒議遂定郊祀尋  
以疾求解詔曰太常職主宗廟烝嘗敬重而華恒所疾  
不堪親奉職事夫子稱吾不預祭如不祭況宗伯之任  
職所司邪令轉恒為廷尉頃之加特進太寧初遷驃騎  
將軍加散騎常侍督石頭水陸諸軍事王敦表轉恒為  
護軍疾病不拜授金紫光祿大夫又領太子太保成帝

即位加散騎常侍領國子祭酒咸和初以愍帝時賜爵  
進封一皆削除恒更以討王敦功封苑陵縣侯復領太  
常蘇峻之亂恒侍帝左右從至石頭備履艱危困悴踰  
年初恒為州大中正鄉人任讓輕薄無行為恒所黜及  
讓在峻軍中任勢多所殺害見恒輒恭敬不肆其虐鍾  
雅劉超之死亦將及恒讓盡心救衛故得免及帝加元  
服又將納后寇難之後典籍靡遺婚冠之禮無所依據  
恒推尋舊典撰定禮儀並郊廟辟雍朝廷軌則事並施

用遷左光祿大夫開府常侍如故固讓未拜會卒時年  
六十九冊贈侍中左光祿大夫開府諡曰敬恒清恪儉  
素雖居顯列常布衣蔬食年老彌篤死之日家無餘財  
唯有書數百卷時人以此貴之子俊嗣為尚書郎俊子  
仰之大長秋嶠字叔駿才學深博少有令問文帝為大  
將軍辟為掾屬補尚書郎轉車騎從事中郎泰始初賜  
爵關內侯遷太子中庶子出為安平太守辭親老不行  
更拜散騎常侍典中書著作領國子博士遷侍中太康

末武帝頗親宴樂又多疾病屬小瘳嶠與侍臣表賀因  
微有諷諫帝手詔報之元康初封宜昌亭侯誅楊駿改  
封樂鄉侯遷尚書後以嶠博聞多識屬書典實有良史  
之志轉秘書監加散騎常侍班同中書寺為內臺中書  
散騎著作及治禮音律天文數術南省文章門下撰集  
皆典統之初嶠以漢紀煩穢慨然有改作之意會為臺  
郎典官制事由是得徧觀秘籍遂就其緒起於光武終  
於孝獻一百九十五年為帝紀十二卷皇后紀二卷十

典十卷傳七十卷及三譜傳序目錄凡九十七卷嶠以  
皇后配天作合前史作外戚傳以繼末編非其義也故  
易為后妃紀以次帝紀又改志為典以有堯典故也而  
改名漢後書奏之詔朝臣會議時中書監荀勗令和嶠  
太常張華侍中王濟咸以嶠文質事核有遷固之規實  
錄之風藏之秘府後太尉汝南王亮司空衛瓘為東宮  
傳列上通講事遂施行嶠所著論議難駁詩賦之屬數  
十萬言其所奏官制太子宜還宮及安邊雩祭明堂辟

雍浚導河渠巡禹之舊跡置都水官修蠶宮之禮置長  
秋事多施行元康三年卒追贈少府諡曰簡嶠性嗜酒  
率常沈醉所撰書十典未成而終秘書監何劭奏嶠中  
子徹為佐著作郎使踵成未竟而卒後監繆徽又奏嶠  
少子暢為佐著作郎克成十典并草魏晉紀傳與著作  
郎張載等俱在史官永嘉喪辭經籍遺沒嶠書存者三  
十餘卷嶠有三子頤徹暢頤嗣官至長樂內史暢有才  
思所著文章數萬言遭寇亂避難荊州為賊所害時年

四十

石鑒字林伯樂陵厭次人也出自寒素雅志公亮仕魏  
歷尚書郎侍御史尚書左丞御史中丞多所糾正朝廷  
憚之出為并州刺史假節護匈奴中郎將武帝受禪封  
堂陽子入為司隸校尉轉尚書時秦涼為虜所敗遣鑒  
都督隴右諸軍事坐論功虛偽免官後為鎮南將軍豫  
州刺史坐討吳賊虛張首級詔遣歸田里終身不得復  
用勿削爵土久之拜光祿大夫復為司隸校尉稍加特

進遷右光祿大夫開府領司徒前代三公冊拜皆設小會所以崇宰輔之制也自魏末已後廢不復行至鑒有詔令會遂以為常太康末拜司空領太子太傅武帝崩鑒與中護軍張劭監統山陵時大司馬汝南王亮為太傅楊駿所疑不敢臨喪出營城外時有告亮欲舉兵討駿駿大懼白太后令帝為手詔詔鑒及張劭使率陵兵討亮劭駿甥也便率所領催鑒速發鑒以為不然保持之遣人密覘視亮已別道還許昌於是駿止論者稱之



山陵訖封昌安縣侯元康初為太尉年八十餘克壯慷慨自遇若少年時人美之尋薨諡曰元子陋字處賤襲封歷屯騎校尉


溫羨字長卿太原祁人漢護羌校尉序之後也祖恢魏揚州刺史父恭濟南太守兄弟六人並知名於世號曰六龍羨少以朗悟見稱齊王攸辟為掾遷尚書郎惠帝即位拜豫州刺史入為散騎常侍累遷尚書及齊王問輔政以羨攸之故吏意特親之轉吏部尚書先是張華

被誅罔建議欲復其官爵論者或以為非羨駁之曰自天子已下爭臣各有差不得歸罪於一人也故晏子曰為已死亡非其親昵誰能任之里克之殺二庶陳乞之立陽生漢朝之誅諸呂皆積年之後乃得厯事未有事主見存而得行其志於數月之內也武乾之會張華獨諫上宰不和不能乘風贊善望其指麾從命不亦難乎況今皇后譖害其子內難不預禮非所任且后體齊於帝尊同皇極罪在枉子事不為逆義非所討今以華不

能廢枉子之后與趙盾不討殺君之罪同而貶責之於義不經通也華竟得追復爵位其後以從駕討成都王穎有功封大陵縣公邑千八百戶出為冀州刺史加後將軍范陽王虓敗於許昌也自牧冀州羨乃避之惠帝之幸長安以羨為中書令不就及帝還洛陽徵為中書監加散騎常侍未拜會帝崩懷帝即位遷左光祿大夫開府領司徒論者僉謂為速在位未幾病卒贈司徒諡曰元有三子祇允裕祇字敬齊太傅西曹掾允字敬咸

太子舍人裕字敬嗣尚武安長公主官至左光祿大夫

通志卷一百二十二



總校官庶吉士 臣侍 朝

校對官助教 臣吳省蘭

膳錄貢生 臣張賦京